



嘉慶二十二年鑄

年華錄

全謝山先生輯

每冊計七折
銀叁錢六分



日新堂藏板

書



丙子夏余寄跡金臺齋頭無事日永如年
惟與蠹魚作緣偶思人生自穉而壯壯而
老其間升沉不同彭殤各異或妙齡而蚤
遇或皓首而成名或盛德不獲期頤或庸
材每臻上壽俯仰陳迹皆足為興感之資
於是采輯舊聞攷稽載籍由一歲以至百

餘咸備列焉正史之外佐以百家廣覽旁
搜手抄劄記積而成帙顏之曰年華錄雖
不足當大雅之林然以備觀覽庶幾博奕
猶賢之意云爾所恨讀書不多不能無掛
漏之病惟俟博綜君子俯而教之幸甚幸

甚謝山全祖望自叙



年華錄卷一

甬上全祖望紹衣氏輯

一歲

白居易始生六七月乳母抱弄于書屏下有指之無
示居易者口雖未言心已默識後有問此二字雖百
十其試而指之不差宿昔之緣已在文字中矣六歲
學詩九歲諳識聲韻

唐書

宰我問黃帝孔子曰黃帝生而神靈弱而能言註子
生七旬曰弱

家語孔子曰人生及三月而微照然後有見八月而
生齒然後能食期而生牘然後能行三年顙合然後
能言十有六年而精通然後化化

又男子八月而生齒八歲而齠毀也二八十有六歲
而化女子七月而生齒七歲而齠二七十有四歲而
化

釋迦生而能言墮地一手指天一手指地曰天上天
下惟吾獨尊故曰世尊

孔氏曰人始生三月而加名故曰幼名檀弓曰幼名

冠字五十以伯仲

北齊趙郡公高獻生三旬而失父及數歲讀孝經則
流涕

晉桓彝生子未期溫嶠見曰此兒有奇骨可試令啼
嶠曰真英物也因名溫後爲大司馬

曹武惠王彬始生周歲父母以百玩觀其所取武惠
左手提干戈右手取俎豆斯須取一印後爲樞密使
金王庭筠生未期能識十七字七歲學詩十一歲能
賦

唐太宗賢妃徐氏名惠生五月能言四歲通論語詩
八歲知屬文

二歲

范喬字伯孫陳畱外黃人年二歲時祖馨臨終撫喬
首曰恨不見汝成人因以所用硯與之五歲祖母以
告喬喬執硯涕泣九歲詣學在同輩中無媒詞後著
劉揚優劣論

范文正公仲淹二歲而孤母貧無依改適長山朱氏
張辰陝西安定人穎慧絕倫二歲從父官上黨所過

山川道里廡置若城郭解字園亭久而不忘指畫成
圖所問響應不窮

萬歷甲午廣東順德縣李氏生子名世嶼二歲不言
善書大字如白沙先生體

三歲

東方朔年三歲天下祕識一覽暗誦於口
郢州別駕黃泳字宋永年三歲書一過目輒誦徽宗引
見摘毛詩如南山之壽一句以發誦泳應聲曰不騫
不墜上以崩字爲問對曰詩人之言不識忌諱

權德輿生三歲知變四聲四歲能賦詩後爲縉紳羽儀

齊東阿王鉉年三四歲時高帝常書臥纏髮鉉上高帝腹上弄繩帝因以繩賜鉉及崩鉉以寶器盛繩開視卽流涕鉉人才甚凡而有此一器

孔子生三歲而梁紇死孔子少孤不知其墓二十四歲而母死

韓愈三歲而孤隨伯兄會貶官嶺表會卒嫂鄭鞠之節孝先生徐積三歲父卒晨昏匍匐牀下求其父甚

哀

金麻九疇三歲識字七歲能草書作數尺大字金章宗召見問曰汝懼怯否對曰君臣猶父子也何懼之有

邱養浩晉江人三歲父抱謁外氏他日潛往家人愕不知所向覓得詰之答曰門牆紅坊折而小巷知爲外家也蓋外家巷連學宮故云一日遊戲外氏園中拾巨珠以奉外祖祖曰何不與爾母答曰實翁家物安得奉母

梁昭明太子三歲受論語孝經一目五行俱下

柳下一小兒纔三歲曲拍皆中節在母懷中食乳擦

手指應蓋宿習也

珍珠船

四歲

任昉字彥升幼聰敏早稱神悟四歲誦詩數十篇

楊綰字公權生聰慧年四歲敏識過人嘗夜宴客舉

坐中一物以四聲呼之衆賓未言綰應聲指鐵燈樹

曰燈盞柄曲

宋眞宗時童子蔡伯希年四歲誦詩百餘篇召爲祕

書正字

開元三年杜甫在偃城觀公孫大娘舞劍器後復觀

其弟子舞云開元三年余爲童稚云云年祇四歲也

唐太宗生四歲有書生見之曰龍鳳之姿天日之表

必能濟世安民遂名世民

謝安四歲桓彝見而歎曰此兒風神秀徹

歐陽修四歲而孤母鄭氏守節自誓親教修讀書

劉恕字道原年四歲坐客有言孔子無兄弟者道原

應聲曰以其兄之子妻之一座驚異

宋陳埴四歲樓鑰嘗指盤中銀杏使屬對埴對曰金
桃鑰曰何據埴曰杜詩云鸚鵡啄金桃

金太原常添壽四歲能詩時爲神童宰相程輝常召
之輝好論醫寫醫非細事四字與之添壽爲塗去細
字改相字輝慙

宋蔡興宗父廓異之語人曰小兒四歲神氣似可不
入非類室不與小人游故以興宗爲之名以興宗爲
之字

蕭穎士四歲屬文觀書一覽卽誦常與李華陸據遊

洛龍門共讀路旁古碑穎士一閱卽能誦華再閱據
三方能記之議者以三人才格高下亦如此

陶季直丹陽秣陵人年四歲祖愛異之以四函銀列
置前令諸孫各取一季直獨不取曰若有賜當先父
伯不應度及諸孫

權德輿四歲能賦詩

虞仲文字質夫四歲作雪花詩曰瓊英與玉蕊片片
落前墀問着花來處東君也不知時人目爲神童
東坡中子迨生四歲不能行請辨才禪師爲落髮摩

頂祝之不數日能行

李德林四歲時誦左思三都賦一覽成誦

北史

蕭大園梁簡文帝子四齡卽能誦三都賦長贍文詞

北史

梁江夏王鋒年四歲好讀書家無紙札乃倚井欄爲書書滿則洗之已復更書如此累月又晨興不肯拂窗塵而先于塵上學書

陳宗遼海衛人穎悟異常四歲能書五歲善文號神童十八成進士仕至尚寶少卿

嘉靖間聞喜縣異童董應嘉年三歲不言四歲始言自能誦千文及大學序卽識千文難字御史余光試之從容循序略無嬉懼爲疏薦於朝

廣東李世嶼四歲時巡按馬文卿召見抱膝上令寫字手甚小握甚固作字如碗口大揮灑甚疾稱爲神童

五歲

蘇頲年五歲時裴談方過其父頲方誦庾信枯樹賦避談字諱乃易其韻曰昔年楊柳依依漢陰今看搖

落悽愴江潯樹猶如此人何以任談歎異之

畢子生五歲而佐禹畢子者臯陶之子伯益也

衛玠年五歲風神可愛祖父太保瓘曰此兒有異於衆顧吾老不見其長成耳

羊祜五歲令乳母詣隣家東垣取前生所弄金環令孤楚生五歲能爲辭章

李白上裴長史書五歲誦六甲

杜子美徐卿二子歌小兒五歲氣食牛

宋李韶五歲能賦梅花

陳搏四五歲時戲渦水有青衣媪乳之自是聰悟日益

劉歊字子圭年五歲聞舅孔熙光讀管寧傳欣然請更讀因聽受曰此可及也 吳均齊春秋

到沆字茂瀆五歲時父攜於屏風抄古詩沆讀教讀一遍便能諷誦

房元齡五歲能誦毛詩高孝基謂裴矩曰此郎必成偉器但恨吾不及見其聳壑昂霄耳

黃庭堅五歲已誦五經一日問其師曰人言六經何

讀其五師曰春秋不足讀庭堅曰旣曰經矣何得不讀十日成誦無一字或遺

王元之內翰五歲能詩適太守賞白蓮倅言於守召吟一絕云昨夜三更裏嫦娥墮玉簪馮夷不敢受捧出碧波心又云佳人方素面對鏡理新粧守曰天授也

趙恂性至孝年五六歲時得甘美之物未嘗獨食必先以哺父父出輒待父還而後食過時不還則倚門啼以待父至數年父歿思慕哀號居於冢側鄉族共

稱其孝

王格京山人五歲時父讀書蘭若格往省侍几側令對曰春臺四角正應聲曰佛殿兩簷高後舉進士

崑山張玉山名廷臣父寬爲錢塘令方五歲署中火覓廷臣不得乃自寢所抱印出走矣有僞檄至輒識之問何以知之曰以前檄篆知之

梁昭明太子五歲徧讀六經

李文正東陽五歲以奇童舉

黃巢五歲時侍翁父側爲菊花聯句翁思索未至巢

信口應曰堪與百花爲總首自然天賜赭黃衣父怪
欲擊之翁曰孫能詩但未知輕重可令再賦一篇巢
賦曰颯颯西風滿院栽蕊寒香冷蝶難來他年我若
爲青帝把共桃花一處開後應舉不第遂聚衆爲盜
卒陷長安

孫文簡承恩五歲吳一齋以紅燭試破卽答曰色似
朝霞光同夜月吳曰此清華色象異日華國之徵
滕曇恭年五歲母患熱病思食寒瓜土俗不產曇恭
歷訪不得俄遇一桑門曰我有雙瓜分一相遺舉室

驚異 南史本傳

鍾會字士季生五歲敏慧夙成蔣濟見而異之謂非
常人

傅祗子暢字世道年五歲父友見而戲之解暢衣取
其金環與侍者暢不之惜以此賞之 晉史本傳

王景文子絢年五六歲讀論語至周監于二代外祖
何尚之戲曰耶耶乎文哉絢以犯名應聲曰寧可道
草翁之風必舅外祖名尚之舅名偃也
到漑子鏡字圓照五歲能詩嘗作七悟文

朱穆字公叔五歲好學

謝瞻幼而聰悟五歲能通元理

庾子與五歲讀孝經手不釋卷或謂此書文句不多何用自苦答曰孝德之本何謂不多

曹冲五六歲有成人之智孫權曾致巨象操欲知其重冲曰置象大船之上而刻其水痕所至稱物而載之則可知矣操大悅

梁江夏王鋒年五歲高帝使學鳳尾書一學即工帝大悅以玉麒麟賜之曰麒麟償鳳尾矣

韓邦靖號五泉苑洛之弟五歲讀論語至文王至德篇若有所思父蓮峯先生問故曰若是則武王非乎

蘇福五歲不言一日見道上死蛙曰出字也時有驛丞見福拾穗隴上戲曰拾穗與神童應聲曰折梅逢驛吏衆驚其夙慧

王陽明生五歲能言一日誦祖竹軒公所讀書訝問之曰聞祖讀時已熟記矣

斛斯徵性穎悟五歲便能博涉羣書

周書

六歲

段秀實至孝六歲母疾水漿不入口七日衆謂之孝童

符堅六歲嘗戲于路司隸徐正見而異焉問曰符郎此官街小兒行戲不畏吏縛耶堅曰吏縛有罪不縛小兒正與左右曰此兒有王霸相

劉卞功年六歲誤觸甕碎家人譙之則曰俟釘鉸者來當爲全之人破尚可修況甕乎

孔文舉有二子大者六歲小者五歲晝日父眠小者牀頭盜酒飲之大兒曰何以不拜答曰偷那得行禮

乎

陸雲六歲與兄機齊名閔鴻奇之曰此兒龍駒鳳雛陸績六歲見袁術于坐上懷橘二枚辭去墮地曰欲歸遺母

宋賈黃中年六歲舉童子科十五舉進士初父恒以蔬食食之曰俟業成乃得食肉

宋劉顯六歲能誦呂相絕秦賈誼過秦

王瞻年六歲從師有伎過門同業皆出觀瞻獨不視從父王僧遠曰大宗不衰寄之此子

陸瓊字伯玉幼聰慧六歲爲五言詩有詞彩

徐勉字修仁年六歲屬霖雨家人祈霽率爾爲文見稱耆舊及長好學宗人孝嗣見之歎曰此所謂人中
之騏驥必致千里

梁簡文帝綱幼而聰睿六歲能屬文武帝弗之信于
前面試攬筆立成帝乃歎曰常以東阿爲虛今則信
矣

王勃六歲解屬文構思無滯文詞英邁與兄劼俱
稱少俊父友杜易簡常稱之曰此王氏三珠樹也

後漢書張堪六歲受業長安號曰聖童

李文正東陽六歲時與程學士敏政皆以神童舉純
皇召見過宮門不能度上曰書生夥短李對曰天子
門高時上御羞有蟹持示二子曰螃蟹渾身甲冑李
對曰蜘蛛滿腹經綸程對曰鳳凰遍體文章純皇曰
他日一宰相一翰林卒如所言

蔡琰邕之女年六歲邕夜彈琴絃絕琰聞之曰第一
絃也復斷問之曰第四絃邕曰偶中琰曰昔季札觀
風知四國興衰師曠吹律知南風不競由是言之何

得不知 本傳

傅咸六歲隨母省外祖母嚴氏嚴氏曰此千里駒也以其妹之女妻之

傅祗子宣字世宏年六歲喪繼母哭泣如成人中表異之 晉書本傳

萬適字縱之陳州宛邱人自號遣元子六七歲卽爲

詩長益好學 宋史

謝瞻字宣遠六歲能作紫石英讚

梁武帝生知純孝六歲哭母哀過成人 梁書

成王年六歲卽位親以其身見于粥子而則之

馬伏波第四子名客卿年六歲能接應諸公嘗有死罪亡命者來過客卿匿之外若訥而內沈敏父甚奇愛故以客卿目焉惜乎夭歿

顧歡六歲家貧父使田中驅鵲歡作黃鵲賦而歸鵲食稻過半父怒欲撻之見賦乃止

宏農楊牢幼孤六歲時就學悞入人家乃父友也二丈人彈棋見楊戲之曰爾能爲丈人詠此局否楊登時父手詠曰魁形下方天頂凸二十四寸窗中月父

友驚撫其首遺以梨栗曰爾後必有文年十八一上
中進士第有詩集六十卷 唐語林

北齊李渾弟繪六歲願入學家人以偶年俗忌勿許
繪伺其伯姐筆牘之便輒竊用未幾遂通急就章

周一經貴溪人六歲從父入郡晨旭方昇顧使屬對
曰東方日出天開眼應聲曰西嶽山高地出頭後舉

進士爲顯官

宋景濂六歲能詩

七歲

李泌年七歲張九齡呼爲小友

李泌年七歲元宗命中使潛伺於門抱以入宮勿使
其家知中人抱至時員儆劉晏皆在側元宗曰後來
者眞國器也命張說試詩賦方圓動靜

王褒七歲能屬文外祖梁司空袁昂愛之謂賓客曰
此兒當成吾宅相

宋璟七歲能屬文一遍誦鵬鳥賦八九歲常夢一大
鳥銜書吐口中而吞咽之遂乘而直上

梁西陽王大鈞年七歲武帝常問讀何書對曰學詩

因令諷詩卽誦周南音韻清雅因賜義之書一卷

宋朝以童子舉太宗時洛陽郭忠恕通九經七歲舉童子科

楊億字大年建州浦城人七歲善屬文十一以童子召對賦詩賦五篇下筆立成太宗歎賞以爲祕書省正字

劉孝綽幼聰敏七歲能屬文舅中書郎王融深賞異之言天下文章若無我當歸阿士阿士孝綽小字也齊晉安王蕭子懋年七歲母阮病危請僧行道有獻

蓮花供佛者三日而花不萎子懋流涕禮佛曰若使阿姨因此勝緣遂獲冥祐願花竟齋如故七日齋畢花更鮮紅阮病尋愈人稱孝感

梁劉芭七歲見諸叔卽泣母以其畏憚芭曰兒早孤不及有識聞諸叔相似故中悲耳

唐劉仁軌尉氏人年七八歲張罔藏見之曰是兒骨法甚奇當有貴祿後至左候射

東海黃琬七歲祖父瓊爲魏郡太守詔問日食多少琬在傍曰何不言日食之餘如月之初

魏常林字伯槐年七歲父黨造門問曰伯先在否何
不拜林曰臨子而字其父何拜之有客大奇之

高郢之子定辨慧七歲讀尚書至湯誓跪問其父曰
柰何以臣伐君郢曰應天順人對曰用命賞於祖不
用命戮于社是順乎郢異之

杜甫上賦頌自稱七歲屬辭

李賀七歲能辭章韓愈皇甫湜始聞未信過其家使
賦詩援筆輒就目曰高軒過

宴公殊七歲善屬文名曰神童

王獻之七八歲時學書羲之密從後掣其筆不得歎
曰後當有大名

王元之年七八歲已能文一日太守席上出詩句云
鸚鵡能言爭似鳳元之卽對曰蛛蜘蛛雖巧不如蠶

唐李百藥七歲父友陸父讀徐陵文刈瑯琊之稻恨
不得其事百藥曰春秋邠子藉稻杜預謂在瑯琊坐
客大驚謂爲奇童

司馬光七歲聞講左氏春秋卽能爲人講羣兒戲于
庭一兒登甕跌沒水中衆皆驚去光獨持石擊破甕

水出兒得活

司馬樸范純仁之外孫也純仁疾必令樸見客方七歲應對晉接宛如成人

宋孫守榮年七歲遇異人教以風角占其應若神

謝莊字希逸七歲能文宋文帝曰藍田生玉豈虛也

哉

張霸七歲通春秋號張魯子

益都耆舊傳

楊周七歲時孔君平詣之設楊梅孔問是君家果耶

答曰未聞孔雀是夫子家禽

金樓子

何宴七歲明慧若神魏武奇愛之養于宮中欲以為子

夏侯淵之子榮字幼權七歲屬文日誦千言經目輒識文帝聞而請焉賓客百餘人人一奏對榮一覽即能歷舉其鄉邑名氏

賈言忠數歲諷日萬言七歲以神童擢第

聞喜人裴敬彝七歲解屬文性大端謹號為甘露頂

舊唐書

金太宗時東平童子劉天驥七歲能誦五經語孟左

傳

杜之偉字子大世以三禮起家少精敏有逸才七歲受尚書十五徧觀文史及儀禮故事時輩稱之後敕撰梁史

釋道安七歲讀書再覽能誦

唐肅字叔元七歲能誦五經

許遜年七歲無父躬耕負薪以養母盡孝敬之道許遜別傳

元祐三年東坡自翰苑出牧錢唐道毘陵之洛社時

孫仲益方七八歲侍父村館東坡望見奇之因呼與語出對云衡茅稚子璠璣器輒應聲曰翰苑仙人錦繡腸坡大歎賞

郡閣雅言云洛陽人王著七歲能屬文十四進士及第

王戎七歲當路有李羣兒競取戎獨不取曰李當路而繁必苦李也果然

魏明帝於宣武場爲欄苞虎邢使力士迭與之搏縱百姓觀之王戎年七歲亦往觀焉虎承門薄欄而吼

其聲震地觀者辟易顛仆戎獨亭然不動帝見問其姓名而異之

韋溫七歲日誦數千言十一舉兩經及第

宋謝朓七歲能屬文父莊遊土山使朓命篇攬筆便就

宋翔字子飛崇安人年七歲劉子翬命賦燈詩應曰耿耿照幽房熒熒鶴焰長昔年江上女曾到乞餘光

劉奇之紹興十年登進士

水紅掌泛清波

劉文榮滋七歲有詩云鶯花新物態日月老天公

魏王脩母社日死脩每至社日悲慟鄰里爲之輟社
岳珂七歲作彌勒佛贊曰行也布袋坐也布袋下布袋何等自在

孫盛子放字齊莊七八時與父從庾亮獵亮曰君亦來耶放應聲曰無小無大從公于邁

晉書

裴俠年七歲猶不能言一日見羣鳥蔽天從西來舉手指之遂言後仕周爲河北郡守

北史

年事錄 卷一 三
吳郡褚允年七歲奕棋已入高品及長冠絕當世
宋書

宋李昉子宗堦七歲能文恥以父任得官獨由鄉舉
第進士卒官翰林學士

明山賓字孝若七歲能言元理
梁書

權德輿七歲居父喪以孝聞
唐書

陳太邱與友期行日中不至太守舍去後客至元方
年七歲門外戲客問太邱元方答以已去友人怒斥
之元方曰君與家君期日中不至則是無信對干罵

父則是無禮友人慚下車引之元方入門不顧

隋梁彥光字脩芝少岐嶷有至性父顯周荊州刺史
每謂所親曰此兒有風骨當與吾宗七歲時父遇篤
疾醫云餌五石可愈時求紫石英不得彥光憂悴不
知所爲忽於園中見一物彥光不識怪而持歸卽紫
石英也人以為至孝所感

徐彥伯七歲能文武后選三教珠英取文詞士極天
下之選而彥伯與李嶠居首
唐書

沈麟士字雲植幼而俊敏年七歲聽叔父岳言元容

年華錄 卷一 三
散言無遺失岳撫其肩曰若斯文不絕其在爾乎及
長高尚織簾誦書口手不息鄉里稱爲織簾先生
南史隱逸傳

楊慎字用修七歲作擬古戰場文時人以其淵雲再
出

王承字安期七歲通易選補國子生十五對策高帝
除祕書郎中

賈嘉隱七歲以神童召見李勤于朝堂戲問吾所倚
何木賈曰松樹李曰此槐也何言松賈曰以公配木

何得非松李狀問吾所倚何樹曰槐樹曰汝不能矯
對耶曰何須矯對但取其鬼木耳李曰小兒作獠面
何得如此聰明對曰胡頭尚作宰相獠面何廢聰明
李狀胡也

如意中有女子七歲能詩則天召見令賦遂別兄弟
云別路雲初起離亭葉正飛所嗟人異雁不作一行
歸

蔡邕集有幼童胡根碑云故陳畱太守胡君子也曰
根字仲原按根乃胡廣孫先廣而殂纔七歲而爲之

立碑不解何謂

劉崧字子高吉安泰和人性仁厚幼穎悟絕人七歲能賦詩世父夜寢聞雞聲因命為題應口成一律末云喚起人間蝴蝶夢起看天上火龍飛

項橐七歲為孔子師

列女傳

吳人范攄處士之子七歲能詩贈隱者云掃葉隨風便澆花趁日陰為方干所賞

解大紳七歲其父引入江沐浴掛衣樹上口占云千年古樹為衣架大紳應曰萬里長江為洗盆

梁蕭恢字宏達文帝第十子也幼聰穎七歲能通孝

經論語義擿發無遺

南史

李百藥子安期亦七歲能屬文與祖德林齊名三世幼敏人多稱之

傅緯字宜事七歲能誦古詩賦至十餘萬言

南史

邵康節生七歲戲于庭蟻穴中別見天日雲氣往來元遺山七歲能詩

江夏吳偉號小仙年七歲纔入塾便伸紙作小畫一幅題其額云白頭一老子騎驢去飲水岸上啼踏蹄

水中嘴對嘴

劉伯祥微七歲道陵召入宮賦鳳凰來儀二首稱旨
又應制賦春柳云翠細圓勻綠綠輕着行排立弄新
晴更看三月春風裏散作飛花滿鳳城

邱瓊山七八歲時從大父往鄉過道旁學館適教者
以鸚鵡爲題命學子作詩邱卽口占之中一聯云應
與鳳凰爲近侍敢同鸚鵡鬪聰明人咸驚異

八歲

東觀漢記曰承宮少孤年八歲爲人牧猪鄉里徐子

明春秋授諸生數百人宮過其廬下見諸生講好之
因忘其猪而聽經猪主見其不還行求索見宮欲答
之門下諸生共禁乃止

謝尚年八歲神悟夙成祖鯉常攜之送客或曰此兒
一座之顏回也尚曰坐無尼父焉別顏回

嚴武母不爲父所容獨厚其妾英武八歲問得其故
奮然以鉄鎚就英竊碎其首父知之左右曰郎誤殺
英武曰安有中朝大臣厚妾而薄妻者武故殺之非
戲也父奇之曰眞嚴挺之兒也

年事錄 卷一
蒲衣子者舜時賢人年八歲而舜師之遂讓以天下
蒲衣子不受而去

世知項橐八歲而師孔子不知蒲衣八歲而師舜也
甘羅十二爲上卿少矣而伯益五歲掌火尤少也唐
文十八創業少矣而放勳十八配天尤少也何王融
之豔鄧禹爲 史書佔俾

晉平公使師曠之周見太子晉與之言五稱而五窮
故曰太子晉生八歲而服師曠

舍利佛生始八歲誦十八部經通解一切義 智度論

修摩那沙彌年向八歲得四神足及得四諦之法 阿
含經

李春熙號沅南年八歲騎竹馬行市中遇一縣令其
屬對丞出句曰書生騎馬街心走舉子乘龍天上來
丞大奇之

馮道八歲作治圃詩有云已落地花方遣掃未經霜
草莫教鋤

宋練亨甫字葆光浦城人年八歲侍伯父出遊亨甫
以手搔頭伯父戲之曰猴悲摸索頭甫應聲曰虎怒

金華錄 卷一
縱橫步又指道旁松曰喬松夭矯龍蛇勢甫曰怪石
巉巖虎豹形年十四以所業見王安石安石喜之呼
爲小友

宏治末楊一清甫八歲自滇過巴陵癯而癯有岳二
州甚器之薦于太守拉觀競渡守陋其狀撫其額曰
苦哉苦哉令賦詩一清應聲曰苦哉苦哉天先皇宴
駕未踰年江山草木猶含淚太守江邊看渡船守大
媿罷飲時孝宗上賓未幾故云

董玘八歲詠胡桃詩曰形狀如雞子剛柔實未分擘
開渾沌殼純是一團一梅月曰夢覺羅浮月已闌君
看雲淨月團團玉人不學桃花面淨洗紅粧鏡裏看
謝璿八歲善詩客命賦援筆立就至紫塞風寒雁叫
霜客驚以爲奇童

寇萊公八歲作華山詩云只有天在上更無山與齊
舉頭紅日近回首白雲低其師謂公父曰此子當作
宰相

裴秀八歲能屬文時人語曰後進領袖有裴秀後官
司空 晉書本傳

樂廣字彥輔年八歲時夏侯元見之謂其父方曰廣
神姿朗徹當爲名士卿家雖貧可令專學必能興卿
門戶 晉書本傳

黃魯直八歲送人赴舉詩云送君歸去明主前若問
舊時黃庭堅謫在人間今八年

徐之才年八歲與從兄康造周捨聽講老子捨爲設
食乃戲之曰徐郎不用心思義而但事食乎之才答
曰聖人虛其心而實其腹捨嗟賞之

蘇子瞻八歲道士張易簡爲師有自京師來以魯人

石守道作慶歷聖德詩示鄉先生子瞻從旁問之先
生曰韓范富歐陽此四人者人傑也公作范文正公
序曰以八歲知愛敬公

張元之年八歲齟齬先達知其不常戲曰君口中何
爲開狗竇元之曰正使君輩從此出入

男生八月生齒八歲而齟齬女七月生齒七歲而齟
宋何敬容惟一子年始八歲在吳臨遷與兄何允別
允問名敬容曰仍欲就兄求名允卽命紙筆名曰珏
曰書云兩玉爲珏吾與弟二家共此一子所謂珏也

謝超宗子幾卿年八歲超宗被徙別父于新亭不勝其慟遂投于江救之得出十餘日方能言

宋王慈八歲外祖江夏王義恭迎之內齋施寶物恣所取慈取素琴石硯及孝子圖而已僧虔子

任昉八歲能屬文自製月儀辭義甚美褚淵嘗謂遙曰聞卿有令子相爲喜之所謂百不爲多一不爲少何妥字棲鳳西山人八歲時遊國子學助教顧良戲之曰君姓何是荷葉之荷河水之河妥應聲曰先生姓顧是眷顧之顧爲新故之故

李義甫八歲舉神童交皇爲上林有捕得鳥者義甫獻詩曰日裏揚朝杲瑤中伴夜啼上林如許樹不借一枝棲上曰朕以全樹借汝

元宗封泰山劉宴始八歲獻頌行在帝奇之命張說親試說曰國瑞也卽授太子正字公卿邀請旁午號爲神童名振一時帝引宴殿內坐宴貴妃膝上親爲畫眉總髻宮人遺花投果

孔穎達八歲就學日記誦千餘言詔學士與論議穎達爲冠年最少老師宿儒皆出其下

永安王浚八歲謂博士盧景裕曰祭神如神在爲有神邪無神邪對曰有浚曰有神當云祭神神在何煩如字景裕不能答 北齊書

謝真八歲爲春日閒居詩從舅王筠奇之謂所親曰此兒方當大成至如風定花猶落乃進步惠連矣 南史 陳書真作貞太傅安九世孫也

裴安祖年八歲就師讀詩至鹿鳴篇語兄曰鹿得食相呼況人乎自此未嘗獨食

張九成八歲默誦六經通大旨父積書坐旁命就客試公答如響且置卷歛襟曰精粗本末無二致勿謂紙上語不足多下學上達某敢以聖言爲法諸老驚異目爲奇童

王應麟之孫厚孫八歲能詩十歲能詞賦後爲象山教職歸養有遂初集三十卷

薛濤八九歲知聲律
何遜八九歲能賦詩

范雲八歲時嘗遇宋豫州刺史殷琰于塗琰呼與語雲應對詳雅旁若無人令賦詩操筆立就琰甚器之

范宣年八歲後園挑菜誤傷指大帝人問痛耶答曰非爲痛身體髮膚不敢毀傷是以啼耳

祖瑩字元珍八歲能誦詩書父母恐其耽書成疾瑩

密藏火父母寢燃火讀書後以文學重一時

北史

元岳桂字止所八歲時觀畫師何澄畫陶母剪髮圖

指陶母手中金釧詰之曰有此可易酒何用剪髮何

大驚卽易之

九歲

元稹九歲學賦詩長者驚其可教

員俶年九歲元宗置高座召三教講論俶具座詞辨

蜂起譚者皆屈元宗奇之曰半千之孫宜其若是

元宗梅妃姓江氏莆田人年九歲能誦二南語父曰

我雖女子以此爲志

王維九歲知屬辭

宋神宗朝元豐七歲賜饒州童子朱天錫五經出身

年九歲賜錢五萬其從兄天申年十二通十經亦賜

出身

羊祜戒嗣子篇曰吾少受先君之教能言之年便召以典文年九歲便誨以詩書

庾闡九歲便能屬文常作揚都賦

揚子雲曰吾家童烏九歲預吾元文

陶淵明詩通子才九齡但覓梨與栗

王勃九歲得顏師古註漢書讀之作指瑕以摘其失

杜子美徐卿二子歌大兒九齡色清徹秋水爲神玉

爲骨

王元之九歲能歌詩畢士安見而異之

滕元發九歲能詩范仲淹奇之

後漢楊厚字仲桓統子也厚母初與前妻子博不相

安厚年九歲思令和親乃託疾不言不食母知其旨

幡然改意恩養加篤

陳元方爲冀州刺史舉秀才崔琰年九歲入其選元

方曰不道卿是金枝玉葉但卿年幼未合此舉琰曰

昔項橐七歲爲孔子師今之自恨年已過矣

虞荔字少坡年九歲隨從伯關侯太常陸倕倕問五

經凡十事荔隨問輒應無有遺失倕甚異之

陳書

司馬朗九歲人有呼其父字者朗曰慢人親者不敬其親者也客謝之

後魏李賢九歲從師受業器畧大旨而已或譏其不精答曰賢豈徒受業至如忠孝之道實銘于心問者慙服

李泌九歲賦詩見者稱賞

鄞汪洙字德溫九歲善詩賦牧鷺覺官見殿宇傾圯歎息題詩上官奇而召之後登元符三年進士仕觀文殿大學士謚文莊

陳祐山汝弼之子敏勳少慧九歲從祐山鄱陽舟中祐山指筆架作對云筆架如山應聲曰棋盤似路又曰蘇家三父子文章可法對曰程門二弟兄德義堪尊

張童子九歲明二經與韓愈同舉禮部拜衛兵曹方正學九歲題嚴陵圖有云親賢在遠色治國先齊家如何廢郭后寵彼陰麗華糟糠之妻尚如此貧賤之交可知矣羊裘老子蚤見幾故上桐江釣烟水
都維明九歲能詩

寧德林莊敏公聽九歲時邑宰包姓者謁其父梅所
先生適有白犬在門顧梅所包因出句云白犬當門
兩目睜睜唯顧主公應聲曰黃蜂出洞一心耿耿只
隨王包歎異以為公輔之器

徐孺子九歲嘗月下戲人語之曰若令月中無物當
極明耶徐曰不然如人眼中有瞳子無此必不明

徐陵次子份九歲能為夢賦陵見之曰吾幼時屬文

亦不加此

陳書

顧野王字希馮九歲能製日賦

甄后年九歲喜書輒用諸兄筆硯言當作女博士鄴
中記

李烈祖為徐溫養子九歲詠燈詩云土人若肯勤挑
撥敢向尊前不盡心

十歲

紀邁廬江人本姓舒母棄之紀淳妻趙氏收育之邁
知其故十歲時傭力所得輒分二母各半事二母至
孝趙為醉人所歐邁乃殺二醉人詣縣自首宥之後
夢一女子曰姓衛自言已死天神閔君無妻使相報

乃詣衛具言其故開棺女活遂爲夫婦

薛道衡字元卿年十歲講左傳見子產相鄭之功作國僑贊頗有詞致見者奇之河東裴瓛稱之曰鼎遷河朔吾謂關西孔子罕遇其人今復遇薛公矣

齊張敷生而母亡年十歲求母遺物惟得一扇乃緘錄之每感恩輒開箚流涕

許邵字子將虔弟也山峙淵停行應規表邵陵謝子微高才遠識見邵十歲時歎曰此乃希世之偉人也又曰當持汝南管鑰

唐丞相路隨父泌從渾瑊會平涼爲虜所執死之隨始十歲母謂之曰汝識父否視汝眉目宛似之隨攬鏡慟絕後終身不敢臨鏡

司馬遷十歲則誦古文

孔融年十歲詣李膺語門者我是李君通家子弟膺問之答曰先君孔子與君先君李老君同德比義而相師友則融與君累世通家

謝惠連年十歲能屬文族兄靈運加賞之云每有篇章對惠連輒得佳語嘗于永嘉西堂詩思竟日不就

忽夢惠連卽得池塘生春草之句大以爲工曰此語有神工非吾語也

北齊邢劭十歲能文日覽萬言在洛陽會天下無事以游宴爲娛不暇勤渠嘗因霖雨五日乃讀漢書畧能遍看一覽無遺

李白上裴長史書十歲觀百家

錢若水十歲華山陳搏見之謂日子神清可以學道不然當富貴

蘇子瞻年十歲父游學四方母程氏親授以書讀東

漢范滂傳子瞻請曰軾若爲滂母許之否母曰汝能爲滂吾獨不能爲滂母耶

趙元昊方十歲諫父勿以馬資中國曹瑄使入覲之見其狀異曰他日必爲邊患

宋江應辰十年能詩博士戲之曰韓愈十三能文今子奚若應辰對曰仲尼三千論道惟公其然

謝朓字敬冲十年能文宋孝武游姑熟勅父莊攜從駕詔爲洞井讚於坐奏之帝曰雖小重也

宋富弼之父客呂文穆公蒙正門下一日謂呂曰有

子十歲許欲令入書院事太祝公子也呂許之一見驚曰此兒他日名位與吾相似厚遇之卽殤也

季充號負圖先生伏生十歲就石壁中受充尚書授四代之事伏生以繩繞腰領一讀一結十尋之繩皆成結

賈彞年十歲詣長安訟父獲申遠近僉曰此子英英賈誼之後莫之與京

孔融十歲盛憲見而異之下車載歸結為兄弟升堂拜母會稽典錄

賈逵十歲能暗誦六經王嘉拾遺記

王弼十歲便好老莊通辯能言何宴曰斯人可與言天人之際矣

何遜集初傳入洛元文遙時年十歲一覽便誦邢劭謂此殆古來未有後魏書

曇無讖本天竺人十歲誦咒聰敏出羣日萬餘言初學小乘後得皮樹涅槃經讀之遂驚悟北涼錄

楊大雅字子正十歲作雪賦日誦數萬言端拱初登第

劉宴年十歲以神童爲祕書正字帝問汝爲正字正得幾字宴曰天下字皆正唯有朋字未正

宋武城王道亨年十歲詠古塔詩云浮屠何代建峭拔入雲端絕頂登臨處摩挲星斗寒劉中行見而奇之曰寇萊公舉頭紅日之句不過是也他日必至三公後官禮部侍郎一本作十二

劉褒字伯寵崇安人年十歲能文後登淳熙進士太常任道遜温州人年十歲以善書貢入京上命書龍鳳二字甚妙乃出對曰九重殿上書龍鳳百尺樓

頭望斗牛上大喜賜予甚厚

夏原吉幼極穎敏年十歲或指屋上獸頭使賦之卽口占曰非龍非虎亦非熊頭角皆因造化爲不向草廬誇氣象卻于廊廟著威儀昂昂飽歷冰霜苦默默長承雨露滋寄語飛飛諸燕雀好來相近莫相疑韓偓小字冬郎嘗卽席爲詩送李義山一座盡驚因有詩云十歲裁詩走馬成冷灰殘燭動離情桐花萬里丹山路雛鳳清於老鳳聲

郝處俊甫十歲而孤故吏歸千緜贈之辭不受

蘇文長十歲上書周武帝異其幼問讀何書對曰治
孝經論語帝曰何言可道答曰爲國者不敢侮於鰥
寡爲政以德帝曰善 唐書本傳

樂天女金鑿十歲忽書北山移文示家人樂天方買
終南紫石欲開文士傳遂輟以勒之 豐寧傳

黃帝十歲知神農之非而改其政 醫子

顓頊十歲佐少昊 帝王世紀

徐鉉十歲能屬文與韓熙載齊名江南謂之韓徐
宋范昺字貫參十歲能屬文

程明道先生十歲能爲詩賦

衛瓘字伯玉十歲喪父至孝過人

臨川李善寧之子十歲能卽席賦詩親友常以貧家
壁立試畧不構思吟曰椒氣何從得燈光鑿處分拖
涎來藻錦惟有篆愁君拖涎蝸牛也

曹子建十歲能誦詩論詞賦數十萬言

王慈十歲時與蔡約造寺正遇沙門懺約曰衆生今
日可謂虔虔慈應聲曰卿惟乃爾何以與蔡氏之宗
慈父名僧虔約父名興宗也 南史

傅昭字茂遠幼孤貧十歲時于朱雀航買日歷刺史
袁顛見而奇之

陶宏景十歲讀葛洪神仙傳日夜討研便有養生之
志

宋李肅十歲能詩後舉進士甲科

宋馬仁瑀十歲時父遣就鄉校輒逃歸又遣之旬餘
不識一字博士答之仁瑀怒夜潛往放火焚學堂博
士僅以身免每集里中兒數十人與戲爲行陣狀自
稱將軍日與約鞭其後期者羣兒畏伏則又市果實

均給之以是人益親附及長遂以將畧顯

宋史

范宣十歲通詩書

呂希哲字原明正獻公公著長子甫十歲事事循規
矩事正獻公祈寒暑雨終日侍立不命之坐不敢坐
名臣言行錄

十一歲

宋白年十一善屬文

晉書周光年十一爲寧遠將軍

宋蔡興宗年十一其父廓成東宅以與兒軌軌後爲

年華錄

卷一

完

郎還送錢五十萬以俾宅直興宗曰一家豐儉必共
不宜受也母從焉軌自愧曰我行年六十行事不及
十歲小兒

徐孺子與郭林宗游學還家林宗庭有一樹欲伐去
之徐問其故林宗曰爲宅之法正方如口口中有木
困字不祥也孺子曰信如君言爲宅之法正方如口
口中有人囚字也豈可居之林宗默然無對孺子時
年十一歲

蘇州童子劉少逸年十一文詞精敏有老成體其師

潘闓攜見長洲宰王元之吳縣宰羅思純二公名重
當時疑未之信因與聯句畧不淹思純曰無風烟焰
直少逸曰有月竹陰寒又曰日移竹影侵棋局少逸
曰風遞花香入酒樽元之曰風雨江城暮少逸曰波
濤海寺秋元之曰一回酒渴思吞海少逸曰幾度詩
狂欲上天凡數十聯皆敏二公驚異聞於朝賜進士
及第續歸田錄

雷孝子天鈞年十一父疾甚天錫從母奩中竊鬚刀
封股縷切寘糜中以進父啜之病良已范石湖爲作

傳

後唐莊宗年十一從晉王討王行瑜入觀獻捷昭宗
異之曰此子有奇表可亞其父賜以灘渤酒卮翡翠
盤因號李亞子 北夢所言

章宗時益都童子劉住兒年十一能誦大小六經
工詩賦所書行草有法孝行夙成召至內殿試鳳凰
來儀賦魚在藻詩賜經童科出身

泉州布衣陳剩夫真晟家始微賤父打銀為業嘗攜
公攻業于人其人密為防公年十一語父曰何執業

而蒙盜賊之防乎勸父舍之自以賣油養父且則從
師講學後為理學名臣

渾瑊年十一隨父防秋立跳盪功

韋溫年十一舉兩經及第拔萃高等父綬疑其假權
謁進召試之文立就不加點乃喜曰兒無愧矣 唐書

何點年十一居父母憂幾至滅性 南史

楊億字大年建州人年十一以神童召試太宗親試
一賦二詩頃刻而成上喜送中書再試執政令賦喜
朝京闕詩亦立就且有願秉忠清節終身立聖朝之

句宰相表賀

名臣言行錄

十二歲

後漢吳祐父恢為南海太守祐年十二恢欲殺青簡以寫經書祐諫曰五嶺海濱舊多珍怪此書若成則載之兼兩昔馬援以薏苡與謗王陽以衣囊邀名嫌疑之際誠先賢所慎也恢乃止撫其首曰吳氏世不乏季子矣

柳惲少子偃年十二梁武帝召見詔問讀何書對曰尚書又問尚書有何美句對曰德惟善政政在養民

梁書

柳遐年十二以百姓禮修謁西昌侯藻風儀端肅進止詳雅藻羨之試遣左右踐遐衣裾欲觀其舉措遐徐步稍前曾不顧盼

禹十二為司空

宋祥符間趙煥以童子召對令從祕閣讀書時年十

二

元豐間饒州童子朱天錫從兄天申年十二經皆通賜五經出身

岳雲年十二從張憲戰大捷號曰羸官人手握雙鉞
鎚重八十斤官至忠州防禦使死時二十二所用鐵
鎚尚存西湖祠

王陽明年十二繼母待之不慈乃潛授計于巫託前
母之鬼戒母而止

潘岳懷舊賦余十二而獲見父友楊君

秦始皇使張唐往相燕不肯行甘羅曰項橐七歲爲
孔子師今臣生十二歲矣君其試臣始皇使甘羅于
趙

虞翻年十二有客候其兄不過翻翻追與之書曰僕
聞琥珀不受傷草磁石不受曲鍼容奇之
一本作十
三

郝士美十二通五經史記漢書皆能成誦

王安石弟安國年十二卽能作銘頌賦詩後用文章
名世

宋王存年十二卽能辭親游學江西五年而後返司
馬光曰能於萬馬疾馳中住足者其惟王存乎

梁劉敞年十二讀莊子逍遙篇曰此可解耳隨問而

年華錄 卷一
答皆有情理家人稱為神童

梁張率年十二能屬文常日限為詩一篇或數日不作則追補之至年十六向作二千餘首

宋王規年十二畧通五經大義

漢景帝時廷尉上囚防年繼母陳殺防年父防年因殺陳依律殺母以大逆論帝疑之武帝時年十二為太子在旁帝遂問之太子答凡夫繼母如母明不及母緣父之故比之于母今繼母無狀手殺其父則下手之日母恩絕矣宜與殺人者同不宜以大逆論從

之

黃香江夏人年十二博覽傳記京師號曰天下無雙江夏黃童人慕其聲名更饋衣物

東漢朱勃字叔陽年十二能誦詩書馬援見之自失後援遇讒勃上書訴寃前後六上詞甚哀切然後援得歸葬

殷陶汝南人年十二以孝稱遭父憂率情合禮有長蛇帶其門舉家奔走陶以喪柩在焉獨居廬不動親戚扶持曉諭莫能移之啼號益盛由是顯名 陶靖節

羊欣父不疑爲烏程令欣時年十三王獻之爲吳興守甚知愛之常夏日入縣欣着新練裙晝寢獻之書裙數幅而去欣本工書因之彌善

鄒智字汝愚四川合州人也年十二能文章羣經子史一目終不忘讀書龍泉菴貧無膏油掃樹葉焚之以照誦讀達旦弱冠登成化進士選拔庶常

淳熙九年女童林幼玉求試中書行省經書四十三件竝通詔封孺人時年十二歲天下稱曰女神童

魯仲連十二折田巴於稷

耿嵩履清高之節齷童介然特立不隨于俗王莽敗盜賊起嵩宗族數百升台分糧嵩年十二三少長咸推之主廩給莫不稱平

東觀漢記

柳公權十二工詞賦尤精書法

王文恪公年十二能詩有以純陽渡海像乞題者公援筆書云扇作帆兮劍作舟飄然直渡海洋秋饒他弱水三千里終到蓬萊第一洲

都維明年十二隨父月樓之杭時中秋集諸文士觀

潮分韻賦詩得擎字維明詩云海門擁雪銀山傾怒
濤洶洶爭奔騰疾聲頃刻如雷霆衝擊三島驚難擎
只疑蒼龍迸斷黃金繩六丁不敢施威靈陽侯宮中
神鬼驚鼓盪元氣時降升更與明月同虧盈天地至
信無遷更憑欄望望詩已成百川萬壑如掌平一座
皆驚呼爲奇童

劉向本名更生年十二以父任爲輦郎

程明道年十二三羣居庠序中如老成人

孫字子稷號楚堂豐城人幼穎敏日誦萬言年十二

賦詩云雪消溪上玉梅寒洗出江南萬疊山曉露未
晞幽夢斷一聲知道是春還謝無逸大賞之後登進
士丞相李綱辟爲椽

盧莊道范陽人也年十二敏悟異常一覽成誦太宗
召見策試擢第年十六授河池尉滿二歲制舉擢甲
科召見太宗曰此是朕聰明小兒

後魏祖瑩年十二爲中書學生時博士張天尤講尚
書生徒悉集瑩誤持曲禮乃置禮於前誦尚書二篇
不遺一字

史

年書錄 卷一 吳
司馬朗字伯進年十二試經爲童子郎

顧野王年十二隨父建安撰建安地記二篇朱异大奇之

後漢書宛人任延年十二爲諸生明易詩春秋顯名太學人號任聖童

李乂字尚真趙州人年十二屬文薛元超曰是子且有海內名後官終刑部尚書

慕容盛年十二時見慕容冲驕溢謂叔父柔曰中山上知不先衆才不出下而輒自驕鮮不覆敗俄而冲

見殺

王元規字正範八歲而孤隨母往依舅氏于臨海臨海土豪劉瑱貲巨萬欲妻以女母以孤弱亦欲結婚強援元規時年十二請曰因不失親古人所重豈得苟安異壤婚娶非類母感其言而止

明正統開會稽沈性字士彝幼穎異十二能詩文嘗夜讀戲作逐睡魔文觀者驚焉後登進士官寧國知府

趙至年十二客緱氏令新之官至與母其道傍看母

曰汝先世非微賤家也汝後能如此不至曰可爾耳
歸便就師誦書蚤聞父耕叱牛聲釋書而泣師問之
答曰自傷不能致榮華而使老父不免勤苦

謝超宗子幾卿十二補國子生齊文惠太子自臨策
試幾卿辨釋無滯文惠大稱賞王儉曰超宗爲不死
矣南史

年華錄卷一終

